

Durante grandioso apertura di Cas di Partido Paradera Otmar Oduber a muestra cu AVP ta prepara pa asumi responsabilidad gubernamental despues di 25 di september



DIABIerna anochi Paradera tabata berde berde durante apertura di Cas di Partido Paradera. Un actividad cu a resulta un exito total caminda miles di nos hendenan a acudi pa duna sosten na partido AVP.

Sigur un tremendo trabou di parti Otmar Oduber y su team cu a percura pa tur cos a bay tremendo unda cu cada un di esnan presente a goza un mundo y a scucha e candidatonan di e partido berde presenta nan discurso mustrando cu nan ta cla pa asumi gobernacion despues di 25 di september.

Discurso di Otmar Oduber a haya un acogida tremendo despues cu su presentacion a cuminsa cu un video mustrando e pasonan di e politico aki for di su inicio den politica te cu awor caminda por bisa cu el a bira un di e politiconan mas stima riba nos isla. Despues di esaki a bin e

presentacion oficial di su jingle cu a wordo canta pa Janiro y cu a laga tur presente lanta para y balia.

Asina a crea e momentum y Otmar Oduber a subi escenario acompaña pa su famia y varios di e miembronan di Team Otmar. Despues di a cuminda esnan presente el a indica: “Awe nochi no tin 200, no tin 300, nos tin Aruba completo riba un pida baranca, ariba un pida Pais cu yama Aruba. Aki shonnan no tin village, aki ta Aruba, aki ta trata di dia 25 di september debil e pueblo di Aruba e gobierno cu e merece pa trese felicidad y seguridad bek den cada un hogar aki na Aruba”.

El a muestra con gobierno di MEP a humiya hendenan, a percura pa tur dia ta den nos saconan, a percura pa aña tras aña pone medida riba e pueblo aki, tur dia a busca un manera pa friends &

family por a haya mas mientras pueblo di Aruba ta haya menos y menos. “E gobierno aki di MEP ta esnan cu tur dia a muestra cu ta den actonan robes. Aña tras aña nos a hiba un oposicion pa muestra cu e pueblo aki no kier un gobierno cu ta basa su mes riba rencor, un gobierno cu ta basa su mes pa probecha di un pueblo pa nan mes por enriquece nan mes cada dia mas y mas”. Aki el a menciona e diferente proyectonan cu ta hole na corrupcion y a bisa cu awor e mensahe cla pa partido MEP ta cu no ta Mike Eman, no ta Otmar Oduber, no ta Benny, no ta Mike de Meza, no ta Arthur, no ta ningun di partido AVP, pero Hulanda a dicidi cu ta basta di corrupcion riba e pais aki. Na e momento ey por a mira e reaccion di publico caminda a grita, bati man mustrando nan sosten pa e declaracion aki.

Mustrando e humildad y deseo

di trese mihor porvenir pa nos pais, Otmar a muestra cu for di 2001 ora cu pueblo a manda señal pa AVP pa bay bek den nan seno caminda tabatin un fraccion di 6 persona, consistiendo di su mesun persona, Benny Sevinger, Carmelita Haynes, Edwin Abath, Harry Oplaat y naturalmente lider di fraccion Mike Eman. Den 4 aña a logra bay di 6 pa 8 asiento den Parlamento y asina a bin tambe Arthur Dowers, Alex Tromp, Mike de Meza y Andy Lee. Nan hunto a lucha pa awe faltando menos di 120 dia pa recobra gobierno den man di pueblo, bou liderazgo di un persona cu no tabatin e necesidad di drenta politica, pero cu a dicidi di asumi un responsabilidad di carga un partido di 6 asiento y hibe na 8 asiento y awe e persona aki ta lider di partido AVP y ta prepara e partido aki den gobierno cu

mayoria absoluto dia 25 di september, Mike Eman.

“Despues di a traha duro, despues di a prepara partido, despues di a reuni cu cada un gremio, cu cada un hende den e comunidad aki, despues cu nos a studia e materianan, mira cu nos ta bay asumi responsabilidad y con nos ta bay trese felicidad y seguridad bek den comunidad di Aruba, con nos ta bay atende cu e problema di criminalidad, con nos ta bay atende cu scolnan cu fan ta cay riba cabes di maestronan y caminda cu e muchanan no tin un material pa studia na scol. Ora un turismo ta cayendo manera cu e ta cayendo na e momentonan aki un lider a para hunto cu su equipo y a prepara nos mes pa e retonan nos dilanti”, di e forma aki Otmar Oduber a yama dilanti lider di partido Mike Eman.